

■ GLOSSA

La super-socca encunter vaschias

DA CLAUDIA CADRUVI / ANR

Gist ad uras per la stagiun da viandar derasa la confederaziun suandanta nuvella: Ins ha sviluppà la super-socca che na fa naginas vaschias pli.

Ellas èn uschiglio formuladas fitg sitgas – las comunicaziuns da la confederaziun. Betg ch'ellas fissan lungurusas. Na, segir betg. Ma ins sto magari leger ellas duas giadas enfin ch'ins chapescha il coc zuppà sut il latin federal-uffizial. Tut auter l'emna passada. «Pes senza vaschias – grazia ad in concept da soccas innovativas.» Uschia tuna il simpel mesadi che la confederaziun trametta viador en il mund.

Ils giuvens schuldads na temian nagut pli fitg che vaschias dolurusas sin ils emprims lungs marschs. Il cussegl usità da purtar dua pèra soccas – suten finas e suravi grossas da launa – na haja fin uss nizzegià pauc encunter ils problems dals recruts. Ils perscrutaders da la Empa, ils experts dad armasuisse e la firma Rohner han perquai cumenzà ad experimentar. Els han sviluppà in prototip d'ina super-socca. Quella è uschè geniala perquai ch'el-

la è fatga cun differentas fibras che adempleschan trais funcziuns.

Primo: Las fibras impeschan che la socca sgurtigia la detta-pe ed il chaltgogn. Sco segund: Ellas tschitschan si il suaditsch. Sco terz: Ellas fan che las soccas èn uschè lommas ed empernaivlas ch'ins sa senta lien sco en il settavel tschiel.

L'emprim han ils perscrutaders fatg tests cun la super-socca en il labor e suenter – damai che miurs na portan naginas soccas – han ins empruvà or ella vi da sessanta recruts svizzers. Lezs han gì da purtar la super-socca sin l'uschenumnà «Laufband» e suenter han ins fatg emprovas en il liber.

Per il marsch grond han ils recruts retschavì mintgamai duas differentas soccas: per in pe la super-socca, per l'auter ina socca ordinaria. Suenter il marsch han ils perscrutaders mesirà da tge vart ch'il schuldà ha dapli vaschias e suaditsch ed ils recruts han stuì relatar tgenina ch'è la pli flotta socca.

Ma nua pon ins uss insumma cumprar la super-socca che armasuisse,

la Empa e la firma Rohner han cuà ora? Prest cumenza la stagiun da viandar ed i fiss bain bel da passentar quella ina giada senza vaschias. En la comunicaziun da pressa na stat betg scrit, nua ch'ins po cumprar la super-socca. La pleadadra dad armasuisse dat pled e fatg. La socca na saja deplorablament anc betg sin fiera. Ins veglia anc evaluar ils tests. Suenter scrivia armasuisse ora l'incumbensa da producir las soccas. Il 2013 dettia l'armada lura giu novs chalzers ed ensemen cun lezs obtegnian ils recruts era las novissimas super-soccas. E tge èsi cun persunas privatas che lessan ir a viandar senza survegnir vaschias? Probabel vendia la firma che produceschia las novas soccas er a privats quest product, exact sco il cuntè d'uffiziers. Ma ins stoppia uss anc spetgar trais onns.

Cun la super-socca n'èsi pia betg meglier che cun las usitadas comunicaziuns da la confederaziun. L'emprim vegn cunitgà lung e lad e cun gronda bahautscha, tge ch'ins ha en senn da far u midar e suenter èsi da spetgar plirs onns fin che la chaussa ch'ins ha cunitgà va en vigur – sche insumma.